



崔東洲集卷之十五

維揚崔桐撰

序十一篇

賀劉華峯荷臺獎序

夫政時有常變非處常者之難也而濟變者之爲難也
也民有羸屈非理羸者之難也而振屈者之爲難也
事有始終非謀始者之難也而成其終者之爲難也
海門地縮邑改百務攸萃其爲時也當其變江嚙賦
繁版築告勞其民力也當其屈前令圖始草昧未集
嗣厥事者任其終予以爲吾邑之令有三難亟論諸

太宰石塘翁翁曰吾當爲子邑掄良令焉迺得華峯
劉侯實精簡也侯蒞邑無何政通人和庶績就緒撫
臣月梧喻翁廉其賢馳幣賜獎華辭侈褒以爲屬司
勸其辭曰資醇謹而公論歸才敏達而邑事舉非溢
美也寅友沈兩河劉碧潭輩欣欣以告余余曰哲哉
月梧翁之知人也試考侯之令吾邑也敷政優優恩
威並著斯不謂之醇矣乎夙夜憂勤動中槩獲斯不
謂之謹矣乎剖決不留庀聚若宿斯不謂之敏矣乎
洞鑑民隱明識治體斯不謂之達矣乎筮仕末期民
譽藉藉綴離和隙興什裕疲是故變也如常屈也如
直終也如始斯不謂公論歸邑事舉矣乎雖然侯政
之善豈曰吾邑爲然侯甫至監察路使君尋檄侯視
篆通州先是州吏失職黷掄其民人情洶洶侯爲均
徭讞獄剔蠹剗萊通民德之及受代歸邑群爲張彩
騰歡掄休頌美者傾城墊是其餘潤旁敷蜚聲遠致
又月梧翁之所未及知也雖然茲直爲侯政之兆耳
行將陟要華摠忠臆公歸天下之心茂舉天下之勳
殆究竟之必可期者一州一邑之善足以槩侯也哉
僉請叙斯言爲侯賀且冀侯之大有成

壽省庵葉大夫序

省庵葉大夫登年六十淮海降祥寔仲夏十有八日也若子姓若鄰比若媯若友喜而稱觴賀之東洲崔子辱在媯友五百里外遣仲子述馳賀焉或曰六十非耄耋比壽之何居崔子曰夫所謂壽者非壽其壽也壽其所以壽也詩不云乎正是國人胡不萬年所以萬年乎人者期萬年乎正人也大夫於予爲丙子丁丑兩同年時大夫少予十年愛其訢訢雅雅噐之宏而言之默也既予職史館大夫職秋曹聯班並者恒朝夕愛其聽以敬而簡以情也大夫守興化子以憲學叅政閩藩愛其政善牧而法不隨也大夫

湖臬予調武林再以折獄遣當路請兵備辰沅愛其志彌堅而義不屈也大夫有宿隙於上官遜膚歸里予亦以昏劣冒薦被論明農獲脩舊好愛其冲襟逸韻脩如澹如不知寰宇間有曲直事吾取以爲師也夫宏默者其真蘊蘊其真者神自全明刑善政者其天存存其天者道日長不隨不屈者中無慾不慾其中者世味淺軼世拔流者其情暢暢其情者心常裕皆壽之徵也奚爲而不可壽問者悅再拜而言曰吾今乃知壽矣亦可以言詩矣吾所謂壽壽乎人者也夫子之謂壽壽乎理者也是知人非南山也而崇大

其理者可以山人非川流也而不息其理者可以川人非松栢之承也而日新乎理者可以松可以栢天保詩人以山川松栢爲祝者其知道矣乎由是克之先天地而不爲少後天地而不爲老者其有道之士乎崔子曰然遂次第斯言以質諸葉大夫

賀少川曹大夫膺臺獎序

少川曹大夫嘗發解中州有司錄其文以傳余得而讀之明經極理知其有深造之學焉既而登春官對大廷試政於春曹余得而親之雅姿淵負入繩履槩知其有用世之道焉無何授守通州以通爲吾產也

問守之道予曰夫守守乎人者也非守於人者也猶夫令令乎人者也非令於人者也所謂守乎人者時有青守以禦防域有警守以遠振俗有滴守以禮讓習有麥守以節制田有征守以藝規風有斷守以法律是故人入吾守而其政僻反是則不然吾以勢而民則侮吾以酷而民則携吾以苛而民則警吾以賄而民則諄吾以法而民則奸是故強者折辱者緘怯者逋無厭者辱是謂守於人而其政弛之二者大夫知所擇乎大夫唯唯而別予亦以踈拙歸里僅暮月鄉之人群謁於予曰吾州日以訥厚聞後是而巷議

囂囂整誹謗矣何今茲之誠如默如耶日以樂土
聞後是而財縮於冢粟虛於困矣何今茲之裕如嬉
如耶日以不究不訟聞後是而暴夫興詭夫爭矣何
今茲之竣如驚如耶守吾州者日以尊且逸聞後是
而政日弊聲日墮矣何今茲之守君子愛之小人歸
之憲臺謝使君聞而亟褒之時譽之獨蚤而獲上之
奄致耶予曰夫名生乎其政者也政行乎其道者也
道原乎其學者也少川大夫吾固知其為有學有道
之士也安有得夫道而失所守者乎安有得所守而
不蚤有譽者乎詩曰樂只君子邦家之基基夫邦家
者天下之守也有曰樂只君子天子葵之葵於天子
者天下之譽也大夫不負所學不違其道而緝熙厥
終焉吾見所守所譽將大有望焉豈曰州郡之小試
臺使之肇獲而已哉州寮某庠寮某輩聞斯言而喜
請授諸史以華大夫

送劉碧潭陟國子博士序

計年視成聯師萃友以考德問業者大學之教也端
本澄源秩清係重毀譽旦夕者司成所任廳館之共
也呼族類羣輟講張喙以指瑕人物臧否師長者學
子之弊習也嗟乎模範乎成均者其嚴矣乎碧潭劉

子領滇南鄉薦教諭海庠閱五稔學勤教成 天子
內召爲國子博士劉子以東洲崔子嘗承乏是役也
問所以師天下之道崔子曰夫道一而已矣而教有
二乎哉吾愛子之教誨而不慾也一而不眩也易而
不戾也且劬劬焉學半於斃弗倦於成也是其師一
邑者非所以師天下乎劉子請益崔子曰夫主靜則
無妄無妄則異物弗溷守一則不暱不暱則勸沮用
章循易則有容有容則好惡惟公多慾則志逞志逞
則紛華易入可眩則偏主偏主則情詭莫覈務戾則
賊物賊物則綱紀陵夷之六者君子小人之分也所

以去小人而爲君子者亦明乎義利之辨而已矣君
子喻於義也是故其爲學也爲性爲心其爲業也爲
國爲民其爲瑞也爲日爲月爲麟爲鳳天下師之則
天下賴之皆義之爲也小人喻於利也是故其爲學
也爲人爲名其爲業也爲身爲家其爲異也爲彗爲
孛爲狐爲蜮天下師之則天下病之皆利之爲也不
佞如予者其何能師哉吾子嘗卒業成均矣盍求之
前後乎予者其爲教孰爲率夫義者乎取而師之所
以師天下也亦求予之遺聲其爲教孰爲涉於利者
乎取而戒之戒之固吾師也亦所以師天下也是故

古昔聖賢辨義利於稱爾稱汝之微已言未言之際
有爲無爲之分其旨亦精矣子尚精於是學吾見靜
者安一者貞易者公所以成已成物之道庶幾矣乎
劉子曰文榮敢不奉以周旋

崔氏族譜序

吾宗自趙宋南度迄今世居海門吾祖朴菴宗伯翁
貽桐宗支一圖始八五公至桐凡十世耳吾父誠齋
宗伯翁嘗手錄數簡用備湮失而未成帙族叔祖竹
鶴翁始倣歐蘇譜畫圖叙世以示後昆桐奉而讀之
有志於輯續而未暇也叔祖季子見禮復承考志錄

至十二世以授桐桐適以明農際迺綜遺考誤闡晦
覈迹舉例樹風而帙以成爾迺萃吾子姓而告之曰
夫譜也者普也懼宗姓之支且攜情義之弗咸而思
以普之也吾今譜吾族之子父乎某祖乎某始祖乎
某則知始祖之愛吾祖吾祖之愛吾父猶吾父之愛
吾子也孝思之心能不追諸遠乎且知夫人有其父
本之由一父也人有其祖本之由一祖也知一父一
祖之由出則血脉本相通也疾痛自相關也慈愛之
心不緣是而及諸後乎斯譜也豈曰唯是溯本原昭
倫叙而勸沮實存焉吾錄夫某曰孝則悖逆者沮所

以親父子也錄夫某曰忠則尸素者沮所以義君臣也錄夫某曰弟則廢懿親者沮所以怡兄弟也錄夫某曰節則失身者沮所以貞夫婦也錄夫某曰好義則鄙吝者沮所以博仁恤也錄夫某曰顯則孱懦者沮所以作士氣也譜之為教不亦普矣乎乃若戾是者不錄何為親譜也懼辱吾宗也子姓咸稽首而感泣曰吾輩蠢蠢橫目自父之外僅知有祖耳今乃知祖之祖孫之孫矣善之必當為惡之必當去矣敢不敬承譜訓

賀太宜人曹母六袞壽序

巳酉孟夏念有九日實曹太母劉宜人設帨之辰適倅遊泉張子過予曰岑也不佞猥佐名邦恒惴惴焉以隕我文僖公家聲是懼幸徼庇於吾長少川曹公用免官謗是公於岑有伯仲之義焉公之母吾母也今年齒介六袞敢謁言於君子以為祝何如是日余既有祝言矣而張子固以善言必再請張子吾郡良吏也故不厭其請而為之言曰大夫可謂備百美以事其親矣古之善事其親者有力養有祿養有善養有達養養以力而不及於祿是謂不崇養以祿而不主乎善是謂不祺養以善而不達於人人是謂不廣

大夫少失嚴恃而獨怙慈幃溫清朝夕不可謂不力
以大夫之祿奉母氏其義可致 寵褒有待不可謂
不崇訓怠戒參以道義相成不可謂不祺庭幃之慶
黎庶既樂之條采復共之不可謂不廣君子謂大夫
之得此殆母氏之賢風成之也嘗聞母氏之闡範矣
篤倫潔祀所以教孝也孝斯忠損慾安約所以教儉
也儉斯廉冰蘖發居所以教節也節斯貞睦族宜家
所以教義也義斯公恤孤周匱所以教慈也慈斯仁
是故大夫之備美以養而內外無間者殆天所以報
劉也今夫匹夫匹婦孝純行篤者稽諸記載多獲奇
徵况賢如母氏繁祉將申錫焉報劉之日安得而
長或曰母氏信壽矣享矣而鳴岐翁之不年也兩髦
之感能無悔耶余曰不然有壽之壽有不壽之壽譬
諸天地其功用一也而語道者必歸諸天蓋地之道
皆天也孰謂母氏之德非翁之德母氏之享非翁之
享乎詩曰至於文王其德靡悔靡悔不在年而在德
翁之謂夫遯泉子曰唯唯若夫子之言豈其壽母亦
所以壽翁

賀貞齋韓大夫歷膺薦獎序

夫咨暑咨寒好風好雨視導帥以為嚮恃者承黎之

故常也愛憎任其情隆污殊所尚事悅有難易取舍
有公昵當塗者之明蔽也高之則近亢異之則若矯
甲可而一非貌翁而中違察采者之恍愉也嗟夫今
之仕者孑然一軀叢萃厥責求其上悅下孳克免官
謗者易得也哉貞齋韓侯以才御史守吾揚也紉巧
敦樸去苛崇簡其剽劇也勤其紆痛也惠其秉憲也
仁其敷教也經其防微也周是故揚之屬土為州惟
三為縣惟七合郡元元遵軌率度歌德舞功者熙如
也邇乃積譽蜚聲遐徵上徹都臺聞之則月梧喻公

韓公涵峯王公以為賢憲臺聞之則監司路史

繼政謝史江防陳史督儲楊史以為賢繩繩焉薦勳
貶獎者日覩其荐加也同寅張少府謀諸群倅曰陟
高則同或者分危濟川則同舟者分險守之慶倅之
慶也若侯者分則朋儕義實師保吾輩其衷厥美而
賀諸迺屬江都張尹達通州曹守金以賀言謁於東
洲桐桐曰吾有前聞矣民弗洽則治弗張服侯化者
合郡焉是得民也上弗知則下弗從嘉侯績者畫一
焉是獲上也近弗信則遠弗揚協恭者咸稱慶焉是
信友也侯所以得此匪調匪詭無將無迎要之本諸
一誠耳孟氏所謂至誠而不動者未之有也侯實有

之侯之歷被崇異積矣久矣而賀自今始蓋有待焉
不能僕僕舉也異日葵心 天子頌德海甸墳箴班
署而史不勝書者非其究竟矣乎桐也株守林壑併
懔餘休日望之日望之

懷隱莊序

丁未秋余明農東海朋故凋落無可與語兩河沈子
適倅吾土愛其氣冲意閒循循雅雅以爲可友也兩
河子亦不憚數過吾廬得聞其漉湖之勝焉無何出
其所藏懷隱詩章數卷謁叙言於余余愕且問曰子
方筮仕而云懷隱何耶曰欽非敢懷隱也懷先君之

隱也先君故號東隱今已矣而杖履之所漉湖存焉
欽嘗莊其所以懷之見夫莊若見先君也余讀其誄
夫莊者皆韻人墨客鳴幽吐華璫如鏗如纍如爛如
若吾親見其載酒往來灑翰淋漓破町畦呼舉白而
鼓掌擊節也讀其記夫莊者曰此吾師菁山子之言
也狀景叙物森焉該潑焉躍若吾躬歷其舊墟對其
壙垠千竒萬秀左顧右盼而曠懷於形骸之外也讀
之終篇有曰莊固以資隱也而仕道亦具焉余乃嗚
然喜豁然悟曰東隱翁之所謂隱兩河子之所謂懷
吾既已知之矣吾既已知之矣夫所謂隱者有跡隱

有心隱所謂懷者有跡懷有心懷巢深栖密耕春稼
秋謝埃軌揚蘭柩而睥睨王侯賓主風月者隱者之
事也是謂跡隱物即我也我亦物也物我皆天也物
與我遊我與天遊動則乾靜則坤何藏何顯何有何
無何損何益何盈何虛隱者之道也是謂心隱廬其
廬則思居處樂其樂則思笑語事其事則思嗜好步
其步則思遊息物有觸焉物有思焉孝子之情也是
謂跡懷乃若人往而道存跡陳而感新憑其虛靜可
思入其徑義可思履其石介可思臨其水潔可思飛
者爲沫者魚天者草喬者木皆天也皆吾與也仁可

心是謂心懷東隱翁之隱果跡耶心耶兩河子之懷
抑跡耶心耶嘗聞之原心者考其行見始者要其終
兩河子之仕吾土也不囿於苛其徵也靜不僞於度
其徵也義不懼於害其徵也介不忤於貨其徵也潔
老恬幼嬉靡有怨咨其徵也仁皆隱之蓄也翁之心
也茲不謂隱資於仕者乎嗟夫菁山子之言見其始
而冀其終者也余也斯言考其終而終其始者也今
廼知翁之隱也非隱也亦仕也子之仕也非仕也亦
隱也此隱之所以爲高而懷之所以爲孝也

賀旋峯輔侯膺臺獎序

旋峯韓侯之蒞興化也克勤攸司治迹茂著交獎於
當塗者聲藉藉也都臺胡公頃復華詞馳幣以爲侯
褒將以風諸屬焉邑僚魏倅周倅費幕輩以爲與有
光榮也介貢士趙子信之謁賀言於東洲桐桐曰侯
之素吾得之稔矣日子督學三楚會侯翁典教黃庠
得以道義相契托焉黃亦人物數也侯時弱冠就侍
翁訓燁燁文譽翔翥士林固嘗識其蓓蕾以爲英物
也既侯以元魁闕抱得雋春官敷對 大廷於予有
一日之雅廼知其有用世之志焉維揚屬邑惟七興
化實爲匯區逋積財屈民鮮阜生爲之長者緩之則

政拙棘之則怨咨重以宿猾弗靖官謗隨之宰是
也亦艱矣侯至嘆曰嗟乎民之靡定司牧者爲之也
於是乎新費宇以振俊髦表淳鹵以立畝極律軍寬
以防陵越殛元愆以弭甚戾翊頽持什百廢具舉且
潤及旁邑頌德者若畫一焉廼知侯之展布果行與
志孚者也吾嘗槩論天下之才訓諸庭而違於國非
孝子也學始修而政終斁非忠臣也易克舉而難則
閔非通才也邇能洽而遠弗懷非咸德也民或譽而
上不獲非茂實也侯之所樹立奉以貽則紆以素業
徵以劇寄達以遐被格以上下君子所謂聚百順以

事君親者侯實有之不賢而能之乎欲令聞之不章
也得乎是可歌也詩曰豈第君子民之攸暨有曰在
彼無惡在此無斁斯已試之成迹也吾當賦此以歌
侯之有俶書曰元首明哉股肱良哉庶事康哉斯非
大業之可待者乎吾尚歌此以佐侯之令終

贈少川曹大夫入覲序

少川曹大夫將以明年庚戌入 覲上計於 天子
今年巳酉冬戒行伊邇庠彥黃生樞江生一山周生
軾朱生淵輩謁贈言於予予曰古者以九載試績第
績於六載三載者有待焉蓋聖人懋成天下之功而

不急於取報也古者以九德觀人事六德者闕其三
事三德者闕其六均之詔爵論祿焉蓋聖人重惜天
下之才不欲失之苟廢也廼若凡品不足群年格不
能律齊民而遂行視民而既發者謂非異譎卓行能
之乎曹大夫之守吾通也僅二載耳嘗夷考其立本
也冰蘖堅其秉心也水鑑公其養民也煩苛蠲其作
人也彛倫篤其剔蠹也甚暴屏其敬獄也窮抑達是
故吉哉有常績用底成閭閻安之老稚歌之當塗者
孚且旌之行將群后四朝覈迹薦成所以爲龍光而
表俊乂者不在茲乎雖然斯固唐虞明試以功之茂

典也今天子體乾燭離日塵民隱正清問垂聰之
秋也大夫所以敷奏以言者其能踵默默者以為已
事耶通民以馬政受疲今茲若少甦矣而直輸尚存
勞者弗息是無群牧之實而蒙孳息之征者也通郡
素號樂土積以汚吏恣割股削孔棘因之歲凶役重
民鮮嘉生是襲富庶之聲而召科派之害者也通城
負海襟江沙寇出沒之區也守禦雖設而卒驕將弛
干城罔聞一有弄潢之虞而江防武夫志在侵掠是
驅虎以搏虎也昔郇模鄭俠數字之獻一圖之陳猶
欲以至誠悟人主大夫據中赤而以斯言敷奏焉則
言與功而並嘉有大造於吾民者也所謂車服以庸
者不再覩於昭代乎黃生輩再拜而喜曰夫子之教
大夫之心也大夫奉是以行可以藉手北面矣

崇川錢氏族譜序

予明農隙方圖續譜吾宗修家政焉適平厓子出所
輯錢氏譜示予予讀之得其世系九九葉焉曰喋非
不欲遡百禩而上之也顧據吾所能知耳懼非信史
姑闕如也得其所追崇斷自福滿而嗣其祀曰是嘗
中世訟役而莫之祀矣式親也安敢以人間之得其
近世三公有遺像焉曰茲喋所及見者也而存之俾

東洲集卷之十五
雲仍仰而侍之猶夫膝下之承歡也得其墓享有田
有時有物有屬有餘惠焉曰均之吾先也均之吾先
之子孫也恩義安得而薄者待其壽且贊厥生銘且
表厥死者有群公之誣章焉曰斯先德之信於友垂
諸後者也誰能泯之得其官有政可有獻懋有寵
焉曰斯先人之訓也天子之命也其能忘乎予爲
撫卷而歎曰孝哉平厓子之斯舉也百善其克備矣
孝子之心懇懇斯貞胄不遙援不欲祀人之祖也孝
子之心厚厚斯遠祀不遺始必求本祖之祖也孝子
之心思思斯著像存近世事一如事存也孝子之心

仁仁斯普祭時義周敬所尊愛所親也孝子之心
末斯傳文載世美念爾祖修厥德也孝子之心至
斯徵樹蹟紀榮孝其親移諸君也錢氏之後末考
思而昭嗣服其昌大矣乎平厓子拜而請曰喋曷以
承當謹登諸譜端以命吾宗且貽吾宗之後是譜者

賀泝泉張君膺臺獎序

孔子曰足食足兵民信之矣夫政亦多術矣而聖訓
惟是之先得非急于惠而嚴保障耶泝泉子之倅吾
通也協寅聯事於少川曹守攄其奇譎濟以警敏堅
以砥礪動必師諸守而靡有關遺守亦重其為良佐

而莫或撓焉泝泉子彌自恣力不難繁劇謂民非食不生也明廸三務藝廸征輸慎乃侵牟而儲備克謂民非兵固衛也預廸閉脩嚴廸偵伺稽廸俘獲而暴民弭茂實欵章蔚有時聞江防吉臺使廉其賢曰是能固吾疆也盍嘉諸監儲龔臺使廉其賢曰是能勤恤政也盍嘉諸於是乎華詞馳幣以交褒焉殆將疏其異績而明揚之也予明農海隅方媿藏厥愛而莫之助也適少川守以賀言詢予曰泝泉子之賢吾得其淵淵矣昔房杜以辛苦立門戶而承家者莫之振焉致垂戒於李懋功崔盧李鄭之裔偃然自高司命者不屑貴焉是先有開而后無裕不爲世美之羞也夫泝泉子之先文僖公以文章魁天下正直樹名節行誼淑後生忠君愛國之訓固厥子若孫耳目之所熟濡世業之所素講者也泝泉子之善若職也豈其惟忠是務無乃克念祖武而有光厥開也歟此其所爲信於民而獲乎上者也其賀也固宜

壽劉母太孺人八十序

己酉正月十日寔劉太母八旬誕辰厥子華峯邑侯偕其伯兄且姪舞斑洗腆爲膝下慶海邑人士懽傾城墊頤躋公堂爲長齡祝予詢其所以壽太母者或

曰侯崇德如山深恩如海吾人仰高而思仁臨淵而感澤每歎焉不知所以爲報也迺今願太母茹西山之紫芝則壽與山俱杖東海之若木則壽與海俱可乎或曰太母安成產也江右之勝豈曰匡廬彭蠡而已哉若安成之螺川騰彩鳳嶺表祥毓秀鍾靈軒鷲遐舉者紀載紛若也吾太母馭娉婷之鶴則與吳女媿休翕烟霞之會則與黃姑匹美以是而爲祝可乎予曰壽稱山水古人有之矣其爲祝也襲而泛壽稱奇詭後世有之矣其爲祝也幻而荒蓋亦歸諸理求諸身矣乎吾稽在昔圖志云吉民龐惇故多壽考夫

龐惇也者誠之謂也天道惟誠故覆物壽地道惟誠故載物壽人道惟誠故大業壽吾聞母氏之賢矣事姑嫜惟孝承夫子惟恭宜娣姒惟睦成諸子惟義崇儉戒靡貞中惠表有誠之道焉姆儀闡範雖不出閭而實有不容揜者是故侯之泣吾邑也家以治公子以御衆不竄端以諱實不飾智以樹聲鉅細必躬鑿鑿靡闕皆誠之爲也母氏之教也是故家庭之慶城堊共之洗腆至情流通踈逖謂非至誠之由動者乎詩曰樂只君子民之父母有曰樂只君子萬壽無期吾以爲母氏之賢篤生厥子厥子之賢父母吾民允

矣其可樂也矣其爲壽也固何不山而高不水而淵
不事奇詭而得其常者八表之慶始有俶矣而今終
可待也夫也僚兩河沈子庠僚雲岡王子山泉伍子
石山陳子幕史少坡黃子方圖所以壽母氏者而有
感於斯言請告諸祝史俾獻壽筵以佐侯之燕喜

贈華峯劉侯八 觀序

巴酉冬邑侯華峯劉君將入 觀上計於

大庭遵今制也邑之人士群謁于予曰邀遮以旌別
廢置以勸懲者聖人勞聰明以成天功之茂典也詭
道以徼免緣力以凌躐者末世懸虛聲以希實賞之

通弊也是故世之牧斯民者每於歲三屆期泐泪其
行巧牟逆股以薦賄炎門昔人所謂連載而入番橐
而歸者匪今斯今也吾邑鯨濤毒民鴻飛未集土旣
蹙矣財日縮矣我侯戒行伊邇行色蕭然不識何以
藉手用紓厥咎乎予曰否否若子之言疇昔之洩瀾
也獨不聞今斯昭明之政乎我

皇上體乾秉離勅法昭度賞不失賢罰不遺貴是故
上而台輔下而百執事惴惴焉恪恭朝夕以光輔休
明罔敢蘊利以奸公蔽賢以病國蓋曠世而一見也
頃將朝會百辟受紀奏成

明元首臨之良股肱弼之賢銓司稽之公法吏繩之
庶者揚汚者激功者錄曠者絀能者慶懦者讓明者
登闇者曠所以核名實以樹風聲者不在茲乎侯之
治迹宿在民譽美斯行也當塗將喜見而嘉之曰是
其人得非澡濯厥修有庶可揚者與邑築就緒有功
可錄者與抑強振弱有能可慶者與剗奸剔蠹有明
可登者與是昔之所棄者今之所崇也子之所憂者
侯之所喜也豈其一令之光榮始百辟之勸也夫兩
河沈子聞之而喜再拜而謁予曰欽也聞諸蓼蕭之
詩矣既見君子爲龍爲光侯之謂也聞諸烝民之詩
矣吉甫作誦穆如清風夫子之言乎請授諸史以慰
之行

賀兩河沈君被臺獎叙

大道之行也賞不擇施罰不偏廢是故朝無素餐野
無沉噐人殫厥力而民受庇焉大道之隱也絀陟視
流品好惡任性情是故賞不及功罰不及罪人沮其
進而民受病焉我

國家式序在位公以肅清以甲科爲高品鄉薦次之
庠貢次之史胥又次之蓋以是爲進階非以是爲殿
最也奉法者或莫之察焉凡有所甄獎聞之者曰是

必甲科流也否則必巧官者也有所激刺聞之者曰
是必非甲科流也否則必簡靜不阿者也是故天下
之居不秩者以時尚所在莫我知也莫不弛若志怠
若司甚至奸官箴以自污嗟夫此士氣之所以不振
而民病之所以可深也兩河沈子以名才雅識授倅
海邦知倅者曰一命之卑非所以處有道也沈子曰
均之事君也奚崇奚卑既蒞治愛倅者曰邑徙民痛
難乎其舉厥職也沈子曰吾擇其易孰任其難於是
乎羽翼厥長任艱分劇邑築告成檄者交至攝公篆
董遠植營海堤紆鄰災暴寃獄遺江寇諸所委授

有僇替殆力於奉公而不浮其報者也監察使行庵
陳君廉其賢廼褒以華詞則以幣牽誠罕舉也時華
峯劉侯並登薦剡侯不以自多而獨爲倅喜謁予言
以展賀焉予曰僇執兩河子之自愛乎哲執陳使君
之掄才乎兩河子不以秩卑而自沮是無所恃而職
其所當職者也陳使君不徇俗以蔽賢是無所而舉
其所當舉者也安得爲臣子者皆如沈倅之不自棄
則天下無不受福之民爲監司者皆如陳使君之公
且溥則天下無不奏功之吏太平之業不可以立致
乎予也斯言豈其賀沈子將爲世道賀

贈少坡黃君入 觀序

廟廊之麗必任棟梁以桂檜而罔秩之小猥以枸橈非備材也大駕之良必馭六飛以騏驥而下乘之末猥以駑駘非備物也藩臬郡縣必寄以賢者能者而幕僚纖秩苟非其人亦豈民利也哉今之居幕僚者藩臬為備而州之目縣之史皆其倫也我

皇明訂謨闕慮設上下以相維俾事必關焉為之幕者其秩也若輕其為責也不亦重乎唯當塗者以其輕而易之也是故居若職者每億億焉以自棄長貳雖才而贊翊者莫之協恭焉欲民之無蠹也鮮矣少

坡黃子之幕吾邑也予嘗觀其績秩如克舉殆嘗學問而胸中有權度者也嘗察其守澹然不汙殆抱朴素而執持有冰蘖者也是故邑之長貳華峯劉侯兩河沈倅交相賀曰吾今得良史矣乎海邑之民土燮而貧治徙而役方嗷嗷也咸欣欣然曰牧有良佐吾民之慶矣乎是故長貳司其綱幕史理其目海邑之治稱無蠹焉已酉冬例當輔侯以行薦計於

天子兩河子謂賢如黃子不可以無贈也謁言於予子曰黃甫產也八閩之才以甫為最譬如奇山異谷多佳植焉可梁可棟者皆桂檜也譬如天駟之閑無

凡品焉可駮可服者皆六飛也迺今黃子遜其大而居夫小焉譬如試尺寸於廟廊克一毛於法駕而小用皆良材也末馭皆良騎也曾謂一邑之贊翊不能為民利而奏成功也哉兩河子曰黃慕得此可以杜其行色矣請張諸祖以華之

壽錢瑞夫六袞叙

歲辛亥孟秋二日定瓊田錢瑞夫六袞誕辰賓筵既張獻觴祝壽者子姓秩如賀客繹如東洲崔翁亦與焉舜臣素生文卿彭生因潘甥衾謁諸東洲翁曰瓊田子之平生夫子知之乎意恬而心渝言愨而行篤不塞不闕何思何慮樂彼瓊田日偕童冠徜徉杯酒而物我若遺是蓋去健羨而脫空溷者也夫子能斬言而莫之壽乎東洲翁曰瑞夫之壽吾知之矣夫壽智不得以多取而享其多者忘乎智者也巧不得以豐獲而樂其豐者忘乎巧者也忘乎智巧者日與物接而無與物競是故外若交而中則逸所謂作德日休自植乎天者也務乎智巧者與物為構日與心鬪是外受役而中則廟所謂作偽日拙自伐乎天者也瑞夫之善植乎天者多矣安得而不壽瑞夫感斯言而喜奏觴再拜而請益翁曰瑞夫諱芝而號瓊咸壽

徵也乃爲之歌曰維東瀛之甫田兮蘊五秀而育瓊
傭淡成之仙裔兮餐白虹而和九莖安希夷而逍遙
兮誕遲遲以茂生素生起而請曰節眉金流瑞呈南
曜正祝祺稱壽之秋也愷木初之後也願借河朔之
杯以爲壽何如翁曰可執生廼舞且歌曰猗斗杓之
西指兮爛南極以表祥濫斑龍之飛馭兮翔玄鶴於
清商歆列仙而酌流霞兮挽頽曦而景長彭生亦起
而請曰桓彭鏗之後也武夷之會臺館鱗萃茲辰坐
密冠裳姁栩間閑無戎於幔亭之樂也桓將壽以鏗
仙之長年何如翁曰可執生亦舞且歌曰幔雲錦以
象廣庭兮歆真侶之翩躚邈九曲之佳期兮爰嗣羨
於瓊田卜鏗霧之降祥兮願玄牝而引年是日賓主
酬酢諄諄悒悒瑞夫鞞鞞然笑而玉山歌殆不知西
陸之景果暘谷而果崦嵫也

崔東洲集卷之十六

維揚崔桐撰

墓誌銘一十九篇

贈中憲大夫鄖陽知府錢公墓誌銘

公卒之明年予適自浙歸省其子鐸奉狀過予再拜
泣曰已丑歲鐸遷肇慶守以吾父老也難其別今果
不復見也情事曷伸知吾父莫如君其銘諸子與公
相鄰比且連姻素受公教愛也銘不能辭公諱盛字
以高號貞齋世居維揚通州餘東場曾祖伯禮祖忠
父遂咸有隱德遂蚤卒公時幼弱祖母朱氏母許氏

養居家索仍之重繇公莫以爲憂也偕其室竭力事
二母唯謹比壯商游淮揚間有所經畫輒倍息遂饒
於財公亦不以自雄也謙謙檢飭敦素寡慾動止笑
語未嘗躁妄淮揚人皆重之家居日惟焚香拜天次
及先祠教子孫甚嚴唯課以讀書勤家崇儉守禮有
小過輒切責謝而後解聞人有善行喜如出已有過
惡即面斥里中少年多有畏沮而不敢讐動者公善
謀有義氣先世戍越舊徃者無生還子孫病之公走
京師援例陳言得入戍神武衛弘治間淮南諸鹽場
逋課萬數公爲奏蠲其半貧民賴以全活正德壬申

嘉靖壬午江溢敗民居死者漂野公惻然聚而瘞之
里有喪葬嫁娶貧不能舉者每佐以財橋梁道路有
圯阨者不靳規理公未嘗學問性與道合嘗戒其子
曰吾少孤失學汝輩勉爲之他日得一命當報効
朝廷毋以家爲也又曰人以言行爲先行不立言不
實何以爲人又曰人須要含忍婁師德唾面自乾真
可師也嘗歲夜方命酒門外有惡聲出視之乃惡少
碎其門矣子姓爭欲禦之公曰妾人也置弗較無何
其人暴死人始服公含忍爲有見公初輸粟授冠帶
以饒貴嘉靖甲申封刑部主事配戴氏贈安人癸巳

元嗣生 詔推恩公贈中憲大夫鄖陽知府戴贈恭
人恭人有淑行先公二十二年卒公不再娶亦不置
妾侍從唯童子一二人曰母以晚年敗吾德也公生
正統壬戌十二月十日卒嘉靖壬辰十一月六日得
年九十有一子三長銳邑庠學生中歲卒次鎰太學
生未仕卒次即鐸辛巳進士累官肇慶府知府孫男
七著蕙芝芳芹藻薰蕃義官芝藻薰太學生蕙芹芳
俱蚤卒孫女一適海門許魯曾孫男三九疇九思九
德女三長許聘通州千戶王廷揚餘尚幼戴初葬海
門西十里以嚙于江也將以又明年十二月十日葬
公于州東四十里馬家區南河之原遷戴合墓焉祔
以銳鎰暨銳配張氏公之言行可式者多不悉誌茲
誌其大者銘曰崑崗良璞不受追琢淵浦巨珍其光
自燭逃名而榮辟爵而祿燁燁 天章皇皇后躅匪
公之求惟公之淑

贈監察御史檜亭錢公墓誌銘

公諱錄字宗政一字宗善號檜亭東洲崔桐家食時
竒其多才績學樂與之遊既廉其行事母至孝母嘗
病篤公露禱請代至割股以療及沒哀毀幾絕雖歲
遠時祀哀泣如初每語及必愀歎涕泗終其身不自

壽曰吾父母慶未嘗用情也事諸兄惟謹至欲析產
諫不可乃慕薛孟嘗之義取其荒頓田廬引其老弱
奴婢尤友愛其弟鉞鉞裕于貲有欲撓之者力爲植
翼撫其子峻視如所出峻成立喜曰吾他日可藉手
見吾弟于地下矣桐益多公之爲人嘉靖丙戌以國
子生授浙江松陽丞縣在括蒼山中俗獷戾號難治
公屢署篆抑豪右裁吏奸百務畢舉縣尹魏君良弼
少許可獨器重公縣故有銀冶盜竊發因剽掠爲民
患公視其所歎曰此禍穴也命錮築之火其旁廬以
杜覬睨丁亥夏復合閩寇勢頗猖獗官兵素無肄而
豪家影庇不可爬搜公授檄督鄉兵捕之歷險道千
餘里無難色生得其渠魁諭散其黨境內以寧公素
以科第自期待屢試有司不偶一階致身非其志也
甫兩暮遂乞休歸就城隅別業沼清流植蓮竹日惟
投壺賦詩焚香煮茗或觴客其中以取適至於俗態
時好一無所遷居常謂其子嶸曰士不難於能文章
取高科而以忠義氣節爲本教諸子曰不傲不愚共
家之業而能達於學義吾願也嶸既仕惟以繫身報
國爲訓曰此爾父宿志爾爲我終之公脩髯偉度約
已務施樂善惜才但疾惡過甚故與時齟齬獨庠友

沈希哲者雅愛公以為知己沈既卒為追念太息不能置公之先世家于通曰福滿曰仲德曰大宥者並以篤行稱至祖思貞有隱德貲產日饒父叔惠多慧而慤惇厚而才鄉評每賢智之母陳氏妙玉性貞淑前母韓氏陳氏庶母朱氏公其行六也室徐氏先公二十三年卒子男六長即嶸壬辰進士初授江西撫州府推官次岍次函出徐氏函為公庶弟錚後早卒次嶺次密次巍習儒業出側室陳氏女五長適楊儒次國子生顧瑤次陳瑤次許適顧鑑次王夔孫男二曰兆賢聘包氏一尚幼孫女三長雲綵許適王一元次雲瑞許適張柱次信采公嘉靖甲午年六月二十六日卒距其生成化辛卯二月二十日年六十有四嶸卜丙申年十一月初九日葬公於狼山鄉倉南之原遷母氏合窆焉以桐雅善公徵桐銘銘曰德浮於位而其施也侈享不究躬而有留於子篤學懋行斯人之紀惟無憾於俯仰以從其是爾蘭爾蕙蔚蔚芳只黃壚天袞瞑目以俟

江將軍墓誌銘

江君諱恩字世祿號味泉子嘉靖庚子八月二十九日卒先三日病歿屬諸子曰吾墓銘必東洲太史吾

不朽矣君蓋以其太宜人於予曾祖母同出於許有
世好也諸子卜癸卯某月日墓君於狼山先塚之右
奉治命狀君行涉南冷抵留都以銘謁讀其狀曰君
之先江右彭澤人元末始祖壽授千戶職於僞吳張
士誠既知其無能爲也歸我

太祖克龍江奕前鋒吳元年從開平王經畧中原有
克俺晉朶兒只諸功進昭信校尉洪武二十二年高
祖溥始改通州守禦所以征迤北及破廣西關寨功
進千戶曾祖達

太宗簡進侍衛祖永有智勇嘗殲海寇八百人有奇
爾是江防絕警父漢字會同視所篆十五年以仁惠
稱予曰世載茂德賢有從也銘哉有曰君少補郡庠
弟子員學舉業於顧進士雄日勤其誨學詩於張弘
傑氏亦能領其指授既承父職督卒伍講武京師暇
即日臨二王書數紙垂老好學彌篤得奇書輒手錄
口誦無倦色循循雅雅如書生也予曰武弁中之儒
者也銘哉有曰君有志民瘼時上官有議徵軍戶羨
丁錢名曰無田屯種者君病其禍貧卒也書十五上
不得請會南臺御史何君宏嘗學正於通嘉君志而
語諸屯僚始奏除之改委防秋建白十事其一請濬

西亭石港金沙三場河以利農商民以爲便淮揚歲
不登當道以調振檄府貳府貳移檄君君捷柅姦冒
責實剔冗郡灾賴是以紓督運京儲力脩前闕羨餘
一無所浼防禦海門倭寇指揮有受制惡卒者君命
縛之窮其宿愆竟以爲戮予曰學而有用儒者所難
也銘哉有曰河南海寇奪舟汎江泊狼山君多爲方
畧獲賊艦二男婦三十八名口中有朱姓者茶商也
侈賣金裝同事者謀殺之以冒賞且利其有強君君
不可商竟獲免且憂官兵不制有殺無辜以爲功者
請禁約於江防使江防使稱仁焉詔召君特加禮遣

督運抵京會鄉之周京推元弼死於逆瑾鄉士夫畏
瑾無敢臨視者君獨尸其所而告諸京兆尹得給棺
斂携櫬以歸姚海山太常初任工曹將督鈔分司瑾
伺之迫君解所乘馬以速其行姚禍乃免馬至斃不
問也北下舟行見一少秀偉踽踽徒行君異之問焉
乃下第舉子閩解元林方山也君察其囊虛延入舟
同寢食抵揚復計程贖之以別林既顯遂爲通家交
士林稱義焉予曰仁且義立人之道也銘哉有曰君
日儻館京師館人有少婦夜奔君君厲聲叱去性不
喜俳優痛拒佛老駟質乾沒之事絕不置齒頰負氣

尚志不能下人好面折人過人亦不敢犯汚秦悍卒
有不相能者輒訴於君君爲曉折無不心媿而退予
曰剛而介者也銘哉有曰君室顧氏封宜人有婦行
先君一年卒君生天順己酉年七十六子三長峯續
世職次岑次一山皆州學生女三長婦凌中丞子兵
馬所次婦李通府子進士妻周俱宜人出次婦千戶
麻寵側室出孫男八長某次某次尚幼女孫二俱幼
予曰是賢而有後者也銘哉銘曰毫素不能以任割
干鏃不能以代結惟君子之弗器用世所哲有文景
煥有武子子文摘英華武揚茂烈温温荆壁錚錚

鐵載德後昆用奠永訣

勅封安人邵母楊氏墓誌銘

水部員外郎邵經邦偕其弟進士經濟奉翰撰江景
孚狀謁予請母氏銘翰撰信人也部郎子庚辰所舉
士暨進士端人也銘何能辭按狀安人楊姓諱淑鸞
家世籍杭壽官員之孫崇安司訓綱之女封君邵公
大峯之妻安人性敏慧少通孝經女誠諸書克執姆
訓學事觀禮無愆父客死京師母孫以憂疾安人焚
香籲天割股以進比婦大峯君君遊郡庠安人懼其
以治生病學請曰門以内妾任之弗欲煩君也廼

勉家政勤織紉慎祭祀禮賓客巨細畢舉無敢告勞
事其舅守恒翁姑周有婦道寒暑先後惟時馳穀甘
瀨惟所欲聲色中禮無怠無忤守恒翁每稱爲賢婦
大峯君篤學而介安人奉之如賓客間以事不歸安
人事女工至夜分以待或當蚤出則廢寢達旦子經
邦經濟幼穎悟遣就學厚禮其傅不爲吝嘗誨二子
曰汝學猶吾女工初無定法要在我心中畫出務期
於成耳守恒翁卒家置於數爨勿克襄事安人脫簪
珥營墓植木咸從厚姑卒亦如之大峯君學成而敏
竒家且日索安人制匄治生承巾櫛無戚顏且慰二

子曰吾某事已辦某事亦有次第勤汝學勿以懈也
經邦舉辛巳進士授工曹郎兩以奉使便歸省每戒
以清慎奉公勿以竊祿苟養爲悅安人約於自奉食
無兼味一帛數十年事外舅母徐如其母迄今墓祀
不廢待冢婦如姑撫媵子如已出祖姑何之女孀居
而煖甥楊榮暨華工藝而貧各調以奩資兄公鑰無
子嗣以子鑰卒厚葬之其篤義每如此甲申以經邦
貴封安人丙戌病癰聞經濟舉進士喜而瘳既遘寒
疾卒五月二十有三日也生於成化戊子得年五十
有九子男八某某女三女孫一十某日葬某地銘曰

為女孝母為婦宜夫宜言勤業孝及舅姑惟家之利
瑞徵鳳雛王言女嘉 恩茂行孚有享弗竟有垂弗
張明明閭懿千祀寰區

孫氏陳孺人墓誌銘

蜀臬副使孫大夫從一先是僉憲浙臬携其配陳孺
人歸省安陸居十日孺人疾作幾殆語大夫曰舅姑
老矣吾且病弗復出于出處當有擇也告其舅姑曰
妾幸婦名家獲被 恩封死足矣但未能終事舅姑
顧以不起之疾貽尊者憂可恨也戒其妾恣曰撫茲
弱息吾奩橐留為婚也遂悒悒而卒嘉靖己丑三月

二十七日也時予有事于郢往弔之大夫以予舊館友
也述孺人語泣訴予予哀之嘆其為賢淑云既大夫
奉司徒翁九峯先生命卜是歲十二月二十八日墓
孺人於雞籠山祖墓所廼狀孺人實徵予銘狀曰孺
人本京師產彭城衛指揮永之女錦衣千戶章彥廣
外孫也大夫侍司徒宦京師先配劉卒因室焉京師
俗好侈育女多驕怠孺人蚤失恃居錦衣公宅聞見
益慧然雅好約素俗不能移也既歸孫司徒公家法
嚴整太夫人內政有度孺人奉以周旋事愈諳練事
司徒公太夫人唯謹勗大夫唯以勤學處分家事勤

儉且有倫祭祀燕會蔬果殺載必親製器具瑣物必
親滌待人有禮宗族長幼下逮重僕無弗德孺人者
厚處先室劉族事劉夫人如已母而獨弗私於陳始
大夫無子爲置妾得令子庭甚憐之蓋孺人幼養有
素長習有範且天性聰敏故生有道死不亂至如此
三生子弗育存二女長得滯疾次許聘都指揮使蔡
洪孫承恩次尚幼弘治庚戌七月四日生得年四十
大夫以孺人配已二十三年得其相多矣哀其弗壽
且無子也追悼不已予爲銘曰弗謂爾不年爾德允
余弗謂爾莫嗣一孽爾延雞籠蠶蜿爾依其先籍籍

閩聲煨煨幽泉

陶母宋孺人墓誌銘

余分守荆南方趨役 顯陵公稽殷積曠謝文墨彭
澤舊知陶仲文氏携其子欽夔走安陸以其配銘請
余雅愛仲文且哀欽夔之戀戀也勉爲敘其狀曰孺
人諱栢字淑節彭澤右族宋時佐第三女母柯氏孺
人性慧淑時佐愛之難其歸既以仲文爲賢曰是可
夫吾女矣遂妻之時舅氏菊本翁老且病亟欲得賢
婦一見孺人喜謂其姑柯曰是可室吾子矣無何翁
卒孺人相仲文克厚襄事奉柯凡若干年敬事色養

畢力饋餽或不給至脫簪珥爲具柯卒孺人躬親含
髻時祀孝思唯謹仲文業醫家善太素方脉視疾不
擇施亦不責以報是故薦紳爭致之每游吳楚荆揚
魯燕趙間孺人代家政巨細整整仲文無內顧也
處姊姒有恩待媼族有禮下之童僕婢媵必加善視
鄰里有貧急者憫然賑之不吝彈儲平居薄自奉獨
慕雞鳴問順之義豐於羞賓見仲文多行善義輒自
喜端端焉每以借德相勗仲文甚宜之子男五長欽
民次欽時次即欽夔次欽中欽臯女一歸邑庠生應
里孫男四濟濟夏濟正濟初女三尚幼孺人善教

子每遣就外學新米舟車起居寒燠百慮周至所仰
唯以忠孝大義不徒事媼煦欽民欽夔治尚書並領
壬午鄉薦欽中欽臯治禮遊邑庠卓有英稱欽時業
醫早折生於成化壬辰仲秋望日以嘉靖丁亥仲冬
十有八日卒得年五十有六屬纊之夕里閭姆媼哭
踊呼號而臨者相望蓋慈惠所得至如此仲文實靖
節後初居番水五世祖鼎梅 國初舉孝廉官彭澤
遂占籍次子圭登永樂戊戌進士爲監察御史菊本
其玄孫也世德有自矣仲文將以嘉靖戊子仲冬某
日葬孺人於五柳庄金魚山之原余以仲文賢也宜

有賢匹諸嗣賢也必自賢母且五柳之忠尚孝廉之
清澤柱史之風烈當有遺慶孺人之素可徵也銘曰
母奚弗年厥壽惟賢母奚弗享厥祚有延懿芳千祀
茂胤綿綿實母之全金魚之下可以長眠

漳州府知事柳公墓誌銘

柳公諱聰字天性號靜齋其先江西宜春人以戍於
通占籍焉高祖曰定二曾祖曰德興祖曰源父曰廣
狷靜惇恪不墮家聲母王氏性貞淑閑姆儀公生而
魁梧穎悟甫八歲就業郡學識者竒之成化二十年
援例入太學事大父母父母以孝稱大父母洎父卒

公以母在故欲終養不仕勗公者曰先人之命也公
不獲已就銓得漳州府知事公復以母老欲乞休鄉
大夫曰不可君命也廼之官暮年佐理條晰漳守羅
公以爲能屬公視浦城篆先是縣吏專事姑息縣多
豪俠有洪珍者倔彊健訟挾邑長以毒其鄉公至得
狀勅法按治珍遂驚伏自是訟息廢舉民用小康弘
治十八年有劇賊巢於南詔驛御史饒公檄公捕禦
愛公者以爲憂公不難於赴義整旅設伏率兵八百
人直搗其巢伏兵夾擊賊潰生得渠首七十人餘黨
悉平御史上其功得 詔賞錫公曰賊尚未可玩也

復請築石城修河隍嚴斥埃以爲備境內晏然正德
元年盜起南靖縣劫公儲殺長吏人心洶洶御史何
公以公宿望移檄屬公公率兵千人臨之賊聞公至
移壘四十里浹旬悉遁去明年公念母不置且聞第
喪乞老於當道不可乃假入覲以歸漳人知其不復
也遮道號泣如失慈母既歸遂築居爲終養計撫第
姪友愛備至終母之身不忍割爨嫁娶衣食力爲之
所擇其中賢者教之遣入郡學有弗率者庭責以義
改即不復念也下至義弟之子孤不能立者亦圖給
焉嘉靖七年母疾公視湯藥晝夜不懈母卒哀毀骨

祭如禮公明於義利之辨取與不苟嘗辭州守
官田之助即其大節而細可槩矣若夫裕業厚畜皆
公之餘未足以盡公也以嘉靖十四年七月二十三
日卒得年六十有八室張氏先公卒子男二長曰文
藩府典膳次曰楷冠帶義民出側室王氏女一適劉
繼遠孫男一曰燭郡學生孫女二在幼次許適祝應
詔文將以公卒之明年閏十二月三日葬公於城西
杜家岡以公與桐父封君編修善奉郡學生祝恩狀
來徵銘且憾奉公之年未及永也桐曰斯鄉先生之
賢者且世契宜銘也銘曰多公者謂前烈克弘其造

愛公者以享齡未及於耄安知夫事君以忠事親以
孝卒志素脩從吾所好天也寔長其聲奚啻夫喬松
之報

白母陳氏墓誌銘

母氏爲通州耆隱陳大祥之女曾祖仲亨秋官公家
教嚴整母時室處克遵姆訓秋官公以爲賢甚愛之
始白宗芳室朱氏病且革語宗芳曰繼夫子室者其
陳氏女乎吾廉其淑行可以母諸孤也朱卒宗芳因
室焉既歸白孝其姑趙事生送死兼盡情禮尤善撫
諸孤不異已出勤勤朝夕期以成立諸孤事之亦不

異已母鄉閭莫不賢母氏而且智夫朱也母性和惠
且儉朴治家節用不事華飾處其家人自伯叔娣姒
下至僮僕無弗得其歡心嘗以手足之義勗宗芳宗
芳遂孝友其兄終其身於貧窶者每賙卹之鄉人有
持農器來易粟者母曰若人易粟以此貧可知矣與
之粟而歸其器宗芳垂老析家財以授諸子母曰幼
子承業安得與諸兄齒且方就師力學多財適損其
志耳於是諸子益知母德之有終也嘉靖甲午十二
月七日以疾卒生於成化丁亥十一月十一日得年
六十有八子男四長承祖次承宗次承先俱朱出次

承業母氏出女二長適成山次適丁蘭孫男十有三
鶴鷗鷺鷗鵬鷗受采崑鶴鷗州庠生餘尚幼女孫七
長適張樞餘在室曾孫一三省卜丙申年某月某日
墓母於狼山鄉祖塋之次徵銘于史氏桐桐以爲婦
人之性多嫉忌而善行尤難於繼室若母氏者豈易
得哉銘曰翼夫子以誼而生者完卹人之遺孤而死
者安淑德有此家人所難徵諸冥石庶斯譽之弗刊

保西郊墓誌銘

保西郊卒厥孫太學生槃奉其師沈生憲狀來徵銘
予於西郊爲故交得其素稔矣爲之序曰君諱愷字

振之西郊其別號也保之先本燕之宛平人勝國時
有名罕者以丞相鎮守江陰路會張士誠取吳拒戰
死之子元善以元帥總鎮閩之建寧嘗三出奇兵戡
定青田寇我

太祖高皇帝統一區夏元善歸義奉命徙揚始家
於通焉高祖彥陽曾祖孟威祖廷玉父經字克綱強
毅果斷有先世風母袁氏有婦德君蚤失怙子於繼
母黃氏既長克盡孝敬父及黃卒喪祭執禮每自咎
曰吾生不及養吾母天地間罪人也語輒泣涕淫淫
下君壯時嘗治家人產動必稟於諸兄一錢尺帛不

以私妻子性敏穎喜讀書諸史傳忠臣義士故實漢
唐諸名家詩間能成詠至於醫卜陰陽天文地理之
術亦旁通焉是以文人墨士多樂交之正德戊辰饑
奉 詔輸粟進散官君曰吾志在賑卹耳市以自榮
非願也竟不冠帶以終其身君生而厚重不喜飲酒
不好弄重然諾難喜怒其設施應變事無易劇畢就
條理是以諸州守凡有委託靡弗稱意卒於嘉靖十
七年八月二十八日距其生天順甲申十月一日得
年七十有五室許氏有淑行先君十四年卒君不復
娶子男二長齧早卒次巵授散官孫男六長棟次即

槃次梓樟槐一尚幼樟槐俱習舉子業女二長適馬
敦州學生次在室曾孫男一女二皆幼保世有令德
其澤不斬君之兄號西河者令曲江有治迹從子欽
領丁酉鄉薦岍洎從孫木果咸業太學巵卜是年十
一月二十六日葬君於永興鄉之原嗟夫西郊之先
公以死事國不可謂非忠以義效順不可謂非智以
西郊之才諳豈不能取青紫以自見然大隱而不章
亦小用而不固是之謂肖於承家不失爲忠且智者
非耶銘曰鑲邪也試以刮難庭除也騁以麟驥唯本
節之札也施奚擇乎其細在達人之爲時也詘信夫

何繫

大理寺左評事 贈太常寺丞石峯林君墓

誌銘

正德己卯林公以諫南巡被杖卒後十八年公子逢春奉磁江鄭秋官憲狀來乞銘予曰嗟乎吾於公爲同年同進諫被杖公往矣而吾苟存銘其當爲之當爲之憶昔南巡 詔下先日廷臣諫者已 詔廷跪矣公欲諫或爲公危之公曰吾知諫無益默默其能安乎疏入 詔獄三日廷杖倍於先諫者公竟以不勝卒嗚呼痛哉公體素羸時寓公署旁所惻惻與一奴俱奴且蓐疾不能職役使若宜隱忍也而奮然爲之既秋昇歸以公署不宜殯殯於同鄉鄭秋官源渙所秋官時亦被杖爲力疾治喪事京師人無弗哀公者歎息曰忠臣忠臣嗚呼時諫者百餘人而在公爲尤難其不敢諫者出門羞澀擁面京城小兒或揄擲之視公爲何如哉公諱公黼字質夫別號石峯少從同里方伯鄭公學既學於大學士上蔡李公雅愛靜修嘗閉處一室端默誦習飲食不關其家人者三年故其學精通經傳子史旁及訓詁韻切篆籀諸書至於軒素醫家術靡不探析公性至孝友居父母喪哀

毀蔬粥三年跣履未嘗出几筵事其二兄甚謹蕭牆之內怡如也中正德丁丑科進士明年授大理寺左評事僅數月庭中稱平又平年卒公平居訥訥言若不出口而其臨大事遇大變確然不可拔如此謂非學問之功孝友之推耶卒二年

今上即位遣官諭祭贈太常寺丞錄其子逢春爲國子生有司祠之鄉賢又割廢寺田若干畝以烝嘗公公之先世居福唐道山坊既有諱全者始徙居長樂之僊山至公凡七世矣曾祖惠祖福皆不仕父節領鄉薦教諭於潛嘉定二學終岐府伴讀贈太常寺丞

母陳氏有淑行贈安人配徐氏封安人皆以公死忠故得推恩男一人即逢春女一人錦適同邑庠生高廷試公成化丙申九月十五日生卒之年正德己卯四月十八日得年四十四嘉靖癸未十一月晦日逢春葬公於所居西十三都之大馬山君子謂學行節義若公銘石不可虛也銘曰學也爲道能拂其施出也爲君死亦以之 天皇何尤臣職固宜黃壚安哉萬祀芳垂

勅封承德郎工部都水司主事隅軒李公墓

誌銘

隅軒李公既卒之後四年厥子大夫香服闋至京師
奉其鄉彭太史狀徵予銘大夫子庚辰所舉士也予
故稔聞隅軒公之賢當於古人中求之空谷邈矣渴
於相見今其已焉矣爲追悼而敘其實曰公諱樞字
問方別號隅軒先世出唐隴西公憲憲之子諱游者
刺袁州遂占籍爲袁人居宜陽坊其支裔又自宜陽
徙分宜居蒔溪曾祖諱楫楫生鐸鐸生煥號公庵娶
謝氏女生公公兒時就外傳授以童訓故事公口是
籍譚譚資口說耳盍易之傳以爲奇授小學大學輒
能通大義更授以論孟中庸駸駸有明經之志會母

氏憂哀毀疇瘠遂廢學稍長或勸之學且仕公曰吾
以哀母疾幸無死若復力學疾必作適以傷父心且
古之所謂達人君子者亦未嘗瑣瑣以爵祿取聲爲
也公庵驗其才足以任家政悉委之公亦幹蠱有方
不以煩尊人事三繼母袁黃袁甚孝謹處二第機傑
甚友愛公庵以是爲樂每語於人曰吾有子矣自是
產日裕以善富右於分宜公庵沒公執喪盡禮一準
諸朱氏會祀寢燬公力爲修廣扁其堂曰敦敘以萃
族姓且慕涑水藍田氏之義創家規立鄉約以爲訓
焉公善教子大夫初學舉子業督責程範甚嚴大夫

領鄉薦舉辛巳進士拜工部都水主事遷廣東按察
司僉事改山東遷山西按察司副使每之官公必戒
曰清白勤慎以忠君澤民吾志也汝爲吾成之幸貽
我好消息大夫敷歷中外二十年所至有聲公之教
也公好施喜賓客性狷厲論事鑿鑿無假借壬午歲
今皇帝御極誥封公如子官公益挹損儉讓不以自
多也晚歲築數楹於敦敘堂西南題曰隅軒暇則端
坐其中焚香讀書或對客談今古有亭亭物表之意
鄉評以有道歸焉大夫屢欲奉公至宦所公曰汝第
善廼職吾無溷汝爲也以丁酉二月六日卒距其生

成化己丑得年六十有九卒之日親戚近遠無弗爭
且哭者配張氏善婦道封安人生四男長即大夫公
補雲南按察司副使次秀爲仲父後郡庠生次讓次
馨也庠生次翻女一月嬌適某孫男五慶餘慶毓慶
衍慶鍾戊戌十月大夫卜葬公於邑西挺秀鄉石坡
東岍潭頭之新原嗟乎今之人多以出處顯晦高下
人物予獨以爲顯而不蹟不若晦而有裨者之賢也
以隅軒公之英邁使就進取豈沒沒居人後者哉然
而尚志自珍得非有托而然者耶夷考其篤倫孝友
善宗化俗成其子以展厥施是蓋不顯之顯無爲而

爲古人所謂善藏其用者非與是故當於古人中求之也銘曰於戲熙公章維舍邪實華其躬用維嗇邪有嗣其通爲谿爲谷自白自雄闡幽鑄真永永厥終

誥封凌安人曹氏墓誌銘

安人曹姓出宋勲臣瑋之後魯山知縣璠之女戶部郎中凌龜田楷之配都御史芹溪公之弟婦也壬申歲以夫貴 誥封安人安人母江氏江氏之母於余曾祖母同出許氏曹許爲通右族於余門爲世姻故余稔知安人之賢安人生而端莊夙閑姆儀 誥封都御史石巖凌公洎太淑人楊氏擇以配龜曰公安

人事姑嫜甚謹孝其母老而不衰楊淑人宜其溫淑每曰是善事我淑人每疾病安人憂見顏色飲食湯藥咸出其手江母嘗患癰晨夕侍養數月不倦江卒爲三年服歲時設位祀之痛江之無子願以子道爲報也龜田公少習舉子業安人與共燈火勞供膳具茗必躬必親龜田公領丁卯鄉薦登戊辰進士授南京戶部主事遷郎中著有治迹無內顧憂者安人所相也龜田公居石巖公憂以疫卒安人驚痛瀕死者幾撫其長子昊次昂次昱極辛苦昊邑庠學生出國子生嘗戒之曰吾所以忍死不與汝父俱者爲汝諸

孤也兒輩其勉之勿墮家聲以昱獨幼恐失恃無所
成立誨之尤嚴安人性勤儉溫厚聰慧過人治家經
理周至不敢侈逸處家介婦甚和睦無所乖忤至揆
度事體暗合於理識者賢之辛丑偶疾不可藥疾既
漸引見諸宗黨姻戚與之敘平生爲永訣以吳輩未
利科目尚念之勤勤且戒以治其後事毋過厚越二
日自求櫛沐正衣衿而屬纊是年六月十日也生於
成化辛丑五月二十有四日得年六十有一男三即
吳昱昱女一玉卿適國子生顧增孫男四飛峯飛巒
飛嶺飛崑孫女七長慕宜適庠生崔有登次慕順適
先生朱淵餘在室吳輩謂安人半生孤節未獲遐
且已之功名汨沒不能一奮揚以慰母心光先烈滿
夷淫淫莫能爲情也余謂若安人之賢節令其始終
且諸子之善繼述亦人世之不易得者復何憾哉銘
曰幽安天植端修惟則士女承夫翊以華國迺孝迺
勤閭模職職淑履貞操實亨其齋秩矣徽音麻其群
息千祀斯銘用褒炳德

東陽陳君墓誌銘

嘉靖甲午東陽陳君孟陽以如臯教諭典文衡于楚
余時督楚學政偕孟陽同事場屋者凡二旬君校閱

精當經藝醇雅余廼知孟陽之才識既余內陟過里
道出東臯臯岸絃誦洋洋秀彥彬彬有安定蘇湖風
焉廼知孟陽之政教無何余以內艱讀禮林居與君
相比境稔聞君學行卓犖北江聞憲學狀其績而薦
之朝部使者張君惟恕檄君主泗州甌山書院廼
知孟陽之有重望君子柯壻鄭啓謨同領庚子鄉薦
辛丑春君以父憂闕携之同校藝于春官余謂孟陽
當爲世大用此舉必得雋魁多士也詎意孟陽偶遭
疾而不作於京邸訃至余爲之涕洟再再非無從也
啓謨狀君平生借其子來徵銘余雅知君義不得辭

按狀君諱清源字孟陽別號東陽世居福唐三山之
東達君天性孝友弱冠丁內艱哀毀如禮壯歲值家
中微君恐遺親憂也誦讀之餘力於治生三弟二妹
咸爲嫁娶父心大慰就職東臯亦爲祿養也君雖天
分過人進學有聲益謙謙自飭與鄉人交彰善諱惡
無有所拂忤鄉評賢之余讀狀至此揖二子而告之
曰子何以東陽君爲哀也哉人生所莫重者德行德
行所莫先者忠孝君也有此足以不朽矣其他顯晦
壽夭皆細故也子何以君爲哀也哉君治禮經辛卯
鄉舉士曾祖某祖某世有隱德父塋達生知命爲鄉

善士母施氏配馬氏承德郎馬石岩封君之女子二
長即柯次杞側室邵氏出女二長歸啓謨次許尚書
郎鄭白湖之孫孫男二鳳鳴鳳舉君生於弘治乙卯
九月二十有一日卒於嘉靖辛丑三月二日得年四
十有七銘曰君位弗揚生有德光君年弗長死有德
芳克孝克忠終古弗忘引之繩之厥後克昌耿耿貞
珉用賁厥藏

陳處士墓誌銘

維揚江都陳處士名永字明遠別號琴村少喜讀書
有大志過目經史能通大義既以幹蠱奪其業每憤

憤曰吾先世閩中福清右族吾祖永泰父克和以元
末徙揚皆汨沒無以自見吾今無似又不能有所成
立忠君顯親心實恥之顧孝友禮義天人所得爲者
吾可以墜棄名教耶居常奉其父洎母朱氏甚謹父
卒喪祭悉如禮事其伯兄湘潭訓導昇仲昂季果至
老敬不衰愛其弟冕甚有恩初兄弟求異產處士偕
伯兄力曉以道義必不可始從之處士計伯兄之將
出仕也適卜居郡學之旁奉其母色養幾三十年母
卒塋祭皆出諸已不以煩昆季處子姓宗族周恤備
至貧不能塋者給以棺長不婚娶者助以財鄉人義

之每歎賞曰賢士賢士嘉靖初有司奉 恩詔榮以
冠帶養以米肉絮帛庚子二月十有三日以疾卒生
於成化辛卯十月十有八日得年七十處士治家勤
約不事靡華至待賓客相與燕樂欵曲必罄其歡鄉
人有逋負多置之不問是以卒之日親朋咸哀之配
張氏有婦道先處士卒繼室蔡氏處士有子男一人
曰拱篤學厲行卒業成均女二人長女慕潔適楊少
尹華之子澣洎拱俱張氏出次女慕蘭適關橋側室
何氏出孫四人長素學郡庠生早卒次素蘊素履素
位孫女一許聘徐橋拱卜壬寅正月三日葬處士于
馬鞍墩拱之室洎余室同出御史李周公溥之裔謂
余稔知處士之賢也來徵銘銘曰繫處士之進止庸
何恥也惟修藏之萃美宅其是也彼浮實之金紫有
識鄙也孰與達人之 恩侈無譽毀也留多裕於後
祀謂有子也惟貞珉之載旨猶夫史也

通議大夫右副都御史凌公墓誌銘

副都御史凌公卒之明年禮曹遵京職三品例狀公
治迹以葬祭請

天子以公爲賢報曰可命有司治葬事翰林院撰文
賜祭一壇公子昕輩以墓銘徵於桐桐奉讀 論文

其畧曰供事累朝蒞官三紀賢勞茂績資望方深又
曰圖用舊臣詎意淪逝訃音來報良切悼傷桐惕然
嗟異曰 聖恩何優渥哉圖報稱以竟厥施公之志
也而今已矣其如 聖眷何哉公諱相字忠甫號芹
溪生而體貌豐偉穎敏強記弱冠領弘治乙卯鄉薦
登己未進士辛酉授山東沂水知縣沂水民健訟徭
役歲不均公至覆惡樹善定額限徵無何沂民畏威
懷德逋負報足當道上其狀尋擢南京廣西道監察
御史公守正不阿苞苴不入嘗論劾不職大臣數十
人士論直之辛未遷 按察司僉事兵備惠湖諸

郡會巨寇大峰嶂李四子等據十四巢爲患公躬親
奮擊火其巢穴巨寇悉平捷奏 天子賜以金幣陞
俸一級丁丑以內艱服闋補山東僉事戊寅遷遼東
行太僕少卿嘉靖癸未遷苑馬寺卿公居遼六年清
理餘丁匿馬歲增萬計兼署分巡決大獄不爲豪右
所奪當道廉其才能檄以督修邊城負城有山曰十
方寺高數十丈廣可十里爲夷虜駐馬所得伺城中
虛實公指麾散夷圍之境内且諭以吾故地與之立
券示無相背監司奏公績 賜銀牌綵幣陞俸一級
丁亥遷四川右布政使時有芒部之役公督餉有方

大軍倚之左右有以買木羨金五千私公者公即日
移文具白撫巡蜀人咸清其操已丑遷雲南左布政
使夷情有積歲難處者公從容籌畫動無遺策爲當
道所器重庚寅遷都察院右副都御史巡撫湖廣兼
督理軍務湖省故有鎮守內監及總兵官諸冗員公
悉奏革之民賴以蘇是歲甘露降嘉禾生黃岡民有
一乳三子者表上 詔賜鏹幣以異其政協修

顯陵工成亦得例賜鏹幣居二年公以病懇疏乞骸
骨得 溫旨慰諭不允辭公素短視前任滇南日偶
失禮於部使者風其同類追論公公亦疏辨且乞休

壬辰得致仕公之先湖湘人元末有萬一翁者從於
通遂爲通人萬一生萬七萬七生子實子實生仲禮
仲禮生守約守約生公祖瑄瑄生雲字 號石巖

公父也瑄雲俱以公貴贈通議大夫右副都御史祖
母某氏母楊氏贈太淑人雲生四子長即公次模早
卒次楷正德戊辰進士歷官郎中次棻公配王氏有
婦德戊辰八月十有四日先公卒始封孺人加贈淑
人繼室翁氏封淑人男五長暢庠生早卒次即昕兵
馬指揮次琅國子生皆王淑人出次曜次曙庠生洎
女三皆側室出長適江一魚二幼孫男一飛閣孫女

四長適顧寬公爲人性至孝石巘公之卒也距今二十餘年每歲時薦奠或有所感必哀泣不已謝政林居日惟涉園登山飲酒賦詩而已或議及國事亦時動敢爲之氣其忠愛之誠固有未嘗一日忘者以庚子五月二十有五日生於成化乙未二月二十有三日得年六十有六平生奏議已梓行壬寅正月三日昕輩奉 恩旨葬公於天港南王淑人所銘曰狼峯之陽江海之浹維時發祥爰鍾吉士皜皜圭璋煌煌金紫在邦忠臣在家孝子維老成人 帝用眷止有龍及先亦榮其死實紀幽藏於昭于祀

龔處士墓誌銘

龔處士名章字汝達其先海陵人元末兵亂東徙通州占籍爲通人處士體貌魁梧慷慨有大志以少孤廢學不得仕然立心制行每每暗合架燹有儒生墨士所不能及焉者性孝友義施舍父卒已餘三十年每值忌辰或婚祭必閉門追慕悲涕不已事其母氏陳孝敬兼至其卒也喪祭竭誠曰必如是可以盡吾心也處昆季子姓懼然無所戾撫其寡姊朱軫室薪米之供終其身四十年不爲倦嘗得石港王姓者遺金數笏又之得其人即歸之於是鄉評乃知處士有

隱君子之行處士之治生雖不能免俗然其胸次軒
豁有悠然不羈之趣中歲繚園幽所築樓其中園以
竹樹几榻左右置古圖史數卷暇則靜觀獨處以自
娛迺自號竹樓處士云晚歲喜賓客置鄉社會昨醉
花下徜徉高歌人莫窺其際也於是鄉評謂處士得
隱君子之樂嘉靖庚子七月二十有七日忽以疾卒
瀕革諸子問以後事處士曰吾平生無不善心亦無
不善事死亦何憾唯諸兒孝汝母勤汝業無忝吾生
足矣於是弔者且哀且嘆知處士得隱君子之達生
於成化甲辰七月二十日年五十有七高祖信卿曾

祖敬永樂間工部主事杭州流判祖璩父源處士配

錢氏側室姚氏徐氏生五子長評國學生次議次謙

庠學生次讓次謨先處士三月卒三女長適顏閭次

適國子生凌旭次許聘溫理四孫長易次詩次禮一

在幼六孫女長許聘胡宰次許徐敏學次許包孝次

許陳某二尚幼評輩奉其戚錢貢士相狀徵銘於東

洲崔子崔子曰人生有一善可稱君子所不棄處士

素取重於月旦是可銘也銘曰德爾行安爾樂廣爾

達何榮軒冕何辱布褐何長年之必期唯斯名之不

拔

東洲集卷之十六
三
愛山陳翁墓誌銘

愛山陳翁以嘉靖辛丑歲三月十七日卒厥于鸞卡
壬寅歲某月某日葬翁於逢吉山原啓翁配李氏之
壙祔焉鸞因子同年陳太史子舉人時奠持進士陳
君鳳狀以墓銘謁予讀其狀而歎曰古者士與士有
行商與商言數謂民各有職也古今人顯者通其仕
晦者高其隱謂人各有志也孰謂其有商而仕晦而
顯者乎按狀翁諱景聰字文敏曾祖德忠祖愉父賢
世居上元泉水里以天順庚辰十一月二十七日生
翁翁以陳之中替也乃謀方士以爲養商於江右會

昌滋殖遂姓實翁雖業末而多行仁義性至孝友篤
於倫理每商歸戀戀難親之別一日旅邸感惡夢亟
歸父果疾已革矣父卒執喪盡禮每以定省踈曠追
憤不已事其母余氏亦甚謹仲弟景通客死會昌翁
傷感成疾撫其幼弟景明就師婚娶悉爲經理嘗謀
諸族屬倣婺源潘氏團拜之禮繪宗祀圖歲首暮舉
行之祭畢而燕昭穆秩秩有古風焉母黨乏嗣歲時
爲奠其墓其娣媼居贍之至老不倦性喜賑施會昌
有千戶牛姓者罹急難翁捐五百金援之不責償又
朱鍾二生翁素善之一生無子爲置妾一生卒於南

雍無所歸爲之殯故人吳亮簿吳縣得劇疾翁拉醫
馳視竟起其危縣尹以多金爲報讓弗取惟取白樓
吳太宰贈言而已值歲大歉翁出穀五百斛貸貧民
後不克償遂焚券有易穀者遺其直涕泗解衣爲質
辭其質而貽以穀官租有逋負繫及其孥者咸爲代
之輸又爲掩道粥粥饑踣閭里重以爲德廼若修梁
道以便徒涉建土穀祠以興賽禱諸可以澤人者罔
不致力時王京兆呂別駕董咸義之檄上元尹賓禮
焉翁有制事才達世故善應變嘗與汪閒齋少宰陳
石峯司馬論民間疾苦俗尚美惡二公爲歎賞再再

嘗見一二憲臣部司以剋爲政者每勸以務從寬大
不聽後果以剋敗始服其先見晚歲怡情泉壑力積
課孫自號愛山主人年八十會

今天子推建

儲恩授以冠服一時名公學士並爲

歌詠讌賀卒之年八十有二也配即李有淑行先翁

十年卒東橋顧司寇爲銘其墓繼室尹亦先卒生一

子即鸞有父風一女歸趙葵二孫稷科二女孫長歸

王材次幼五曾孫思銳思學思敬思義思理三曾孫

女皆幼嗟夫愛山翁商者也而士其行晦者也而有

顯者功是豈可以富翁拘士例之耶銘曰礫有璧耶

處溷溷而美中豐之劍耶莫之試而氣雄托於貨而
義以隆逃乎名而實也功吉山巖巖以宅女終

朱孺人王氏墓誌銘

孺人諱淑清爲通州守禦所武畧將軍王君彪之仲
女彪之室於余曾祖母同出於許許海門著姓也將
軍魁岸多智勇卓卓鳴立羣表凡嫁女必掄佳特謂
朱君允恭冢嗣盤之仲子方秀而雅也遂妻之朱故
鳳陽右族避元亂占籍於通至允恭洎槃日益滋殖
方字必義正德間輸財助逆拜職千戶溫姿雅度有
儒者風孺人婉且慤有閨德其歸朱也姑保氏嫠居

事之甚謹供甘毳奉區櫛必躬必親不敢弛逸奉夫
子敬惠無留昵每勗之曰欲順父母必宜兄弟子能
是妾亦可以婦矣是以必義之友其諸伯仲相翕三
十年不求異而姑亦洩洩焉忘其嫠也孺人善教子
嚴內訓長子淮仲淵季治皆相必義延師授以舉子
業淮淵共充郡庠弟子員臺試或不錄必戒以彌篤
學不欲其一蹶懈志也孫廷相廷卿雖稚齒亦勤以
揖讓長女適余子官生有繼次適國子生顧希夔次
適孫桃源子慈每歸寧必戒之曰毋忘姆訓以貽姑
嫠憂爲父母羞宗婦曹尹南山女介婦凌正郎龜田

東洲集卷之十六
女孫並服厥規以雍睦聞孺人生弘治戊申五月二
日卒嘉靖庚子十二月二十五日得年五十三必義
卜壬寅某月某日葬孺人於某所奉其子之師慈湖
張黃門狀徵銘於東洲崔子崔子以戚故不能讓也
銘曰顯顯宗嫺韓姑之光敬仲協吉于飛鳳凰母也
嗣之厥源孔長有秩徽音朱其克昌幽蘭萎矣餘此
後芳載休貞珉以鑑爾藏

崔東洲集卷之十六

